



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma :

f Tir Yimyim

ig tiryimyim@aolima

yt tir yimyim

TAPAK 8

Congress MLA timbaka BJP nung adentsü: Bhabesh

Iraq PM Mustafa'er ki drone agi amak



VOL. XIX ONO. 31 (ADOK 31) DIMAPUR TENTONÜ (MONDAY) YIMPOKSÜI (NOVEMBER) 08, 2021

₹ 5.00

DGP Nagaland John Longkümer-i Molungyimsen nung sarasadem



(Abelen nungi) DGP Nagaland, T. John Longkümer, IPS-i Molungyimsen nung Dr. E.W. Clark-i tema yutsüba litchi süngdong anasa agiba aser Clark Museum nung aliba Visitors Book nung tenüng züluba noksa angur. (Molungyimsen, November 7)

Molungyimsen, November 7, 2021 (TYO): Nagaland nung Director General of Police (DGP), Wb. John Longkümer, IPS-i Deobarnü Molungyimsen nung sarasadem mapang ka agitsü atema aru.

Molungyimsen nung arogo lennirtem aser yimten yimsüsürtem den sensaksem ka alidang pai DGP Nagaland ama masü saka John Longkümer ama semdang ta ashi.

"Molungyimsen yim ajanga Rev. Dr. E.W. Clark-i Ao lima aser Nagaland ajungalen Khristan yimsü aser shisaliok prokshi. Iba temoatsü nung ozü yim Changki dena lir kechiyong Dr. Clark-i ozü yim semdangba ajanga ozü yimeria Khristan yimsü agizük aser iba temoatsüji agia arur" ta pai ashi.

"Akhidang nungi Molungyimsen aser Changki tsüngda tesentaktep tajung lir aser talisa ni tanü Molungyimsen semdangbaji iba tesentaktep akangshitsü aser ozü yim nung tanüla asentenshi den tesünep meshia sarasademsü atema aruba lir" ta Wb. John Longkümer-isa metetdaksü.

Tanü Wb. John Longkümer-

i Dr. Clark-i atemba litchi süngdong semdangba den ano taoba Nagaland Governor Shyamal Dutta-i lapoktsüba AKM nungshilung aser Wb. J. Bendang, IPS-i yangluba Clark Light Tower nung Clark Museum semdanga liasü.

Sensaksem alidang Molungyimsen arogo lennirtem aser yimten yimsüsürtemi Wb. John Longkümer dang pelaba metetdaksü aser pai yim semdangba ajanga akhidang nungi Molungyimsen aser Changki tsüngda tesentaktep tajung aliba akangshioho ta ashi.

Iba sentong nung Molungyimsen Baptist Arogo pastor Rev. S. Tajung-i Wb. John Longkümer atema sarasademja liasü.

Molungyimsen yim ya Nagaland sorkari Naga Christian Pilgrimage and Educational Heritage Village ta tenüng jalokja lir.

Ano 2003 kum Ao Kaketshir Mungdang (AKM)-ia Molungyimsen dang "Cradle of Education" ta tenüng jaloktsü aser ibaji Naga Students' Federation (NSF)-ia pusema nungitogo.

Tanü Dr. S.C Jamir-i Padma Bhushan agizüktsü

Dimapur, November 7, 2021 (TYO): Hombarnü (Nov. 8) Rashrapati Bhavan nung India Tir Ram Nath Kovind-i taoba Nagaland Chief Minister Dr. S.C Jamir nem Padma Bhushan konang agütsütsü.

Deputy Secretary (Public), MHA Vijay Kumar-i October 14, 2021 nü Dr. S.C Jamir dangi züluba shidi ka nung November 8, 2021 anepdang 11:00 ako nung Padma Award agütsütsü ta shia liasü.

January 26, 2020 nü 71 buba Republic Day amongdang taoba Nagaland Chief Minister aser Congress lennir Dr SC Jamir nem Padma Bhushan agütsüba osang metetdakja liasü.

Padma Bhushan ya India nung civilian award tasembuba lir aser public affairs wadang atema Dr SC Jamir nem

agütsür.

Dr. S.C Jamir-i Nagaland nung kümsük punguben tashi chief minister inyakba sülen 2004 nungi 2018 tashi Goa, Maharashtra, Gujarat aser Odisha state tem nunga Governor inyakogo.

Dr. S.C Jamir-i iba konang agizük New Delhi nungi meyipa arudang Dimapur nung tayimtsü anendak nungi par ki tashi lenmang songtema nisung meyrjang aika tarensena noktaker agizüktsü atema Ao Senso Telongjem Dimapur (ASTD) lenirtemi sentong renema lir.

Taküm asoshi Tir Ram Nath Kovind-i Padma Awards 141 agütsütsü molunga agizük. Item rongnung Padma Vibhushan 7, Padma Bhushan 16 aser Padma Shri Awards 118 dena lir.

State sorkari ULBs nung nisung shimoktsüba magizüker: NPP Nagaland

Dimapur, November 7, 2021 (TYO): Nagaland State sorkari ULBs nung züngsemtem mapang telatet ka atema shimoktsü ta lemtetba magizüker aser iba ya ozüngi memelar, ta National People's Party (NPP), Nagaland State-i sangdong ka nung ashi.

Iba osang ya tawa tu Planning & Coordination, Parliamentary Affairs and Land Revenue Minister, Neiba Kronu-i metetdaksü ta parnokisa ashi.

ULBs nung tetsür nem 33% lemezüktsüba onük paidoktsü merangba ajanga state sorkari tongtipang law & order onüktem mapa meinyaktetba sayuba dang masü saka sorkari politics mangatetba aser sayur. Kechiyong sorkar ketdangsubaren nung ULBs ya

tongti shilem ka lir aser Local Self Governance meinyaktetra kodaser democracy alitsü? ta NPP Nagaland State-i asüngdangogo.

ULBs nung sokari nisungtem shimokbaji ozüng alema lir kechiyong sorkar den jungteper nübotem dang shimtsü. Iba ajanga tejak repranga aser saklokertem shimba inyakyim tenzüktsü aser Nagaland nung ochimashi züintsü. State sorkari nübo shimokba ajanga ULBs ajanga revenue bendenba sen tim mesüi amshitsü, ta parnokisa metetdaksü.

State sorkari sendaktepa alirtem dang asüngdangya mesüi iba ama telemtetba agiba ajanga metokmeperi aser temolung melemtep adoktsü. Külen, sangküm State Assembly

Election agitsü lia iba telemtetba agiba nung taittsü ajieteter kechiyong ruling party aser parnok den yaritepertemi Dimapur amala Municipal Areas nung parnok party aser candidate tem jenjang jungdaksütsü atema inyaksü, ta NPP-isa ashi

State sorkari iba telemtetba agiba aitsür aser Civic Bodies, kin Hoho tem, kaketshir teloktem aser kasa tangatetba alirtemi anema ola adoktsü ayongzük, ta National People's Party, Nagaland-isa metetdaksüogo.

Nübertemi sorkar ketdangsubaren nung tamang akatsü atema State sorkari tekaratiba nung ULBs indang election agitsü takhangba agütsür, ta parnokisa ashi.

COVID-19 Nagaland: 13 dak putet & 10 taneptsü angu

Kohima, November 7, 2021 (TYO): Nagaland nung Deobarnü nisung 13 dak COVID-19 putet aser 10 taneptsü angu.

"Tanü putetertemji Dimapur nung 5, Kohima nung 3, Mokokchung o Peren nung anana (2) aser Zunheboto nung 1 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Tesüiba ghonda 24 tsüngda Covid-19 puteta alir nisung 10 taneptsü angu. Parnokji Kohima nung 4, Dimapur nung 3,

Mokokchung nung 2 aser Peren nung 1 lir" ta paisa ashi.

Nisung 31,935 rongnungi 30,008 taneptsü nguogo aser ibaji taneptsü angur 93.97% lir, ta Dr Kikon-isa ashi.

Tang nisung 191 anepaludar saka parnok 157 dakbo shirangba yimya kecha mali, ta paisa shisem.

"Honibar tashi nung nisung 713,922 nem COVID-19 vaccine indang dose 12,18,523 agütsüogo" ta State Immunization Officer, Dr Ritu

Thurr-ia ashi.

Vaccine agirtemji frontline workers 60,963, healthcare workers 15,998, arishi küm 45 ser temapur 202,880 aser arishi küm 18 nungi 44 tsüngda lir 434,081 lir, ta paisa ashi.

"Vaccine agirtem rongnungi nisung 504,601-i dose anaprong agiogo. Parnokji frontline workers 48,070, healthcare workers 13,431, arishi küm 45 ser temapur 163,804 aser arishi küm 18 nungi 44 tsüngda alir 279,296 lir" ta Dr Thurr-isa ashi.

AWUMT-i tang teyangludak NH-2 lenmang semdang



AWUMT ketdangsurtem den department nungi ketdangsur aser contractor telungjem nung tang teyangludak Mokokchung town ajanga süiba NH 2 lenmang semdanga jajaba mapang tangokba noksa nung angur.

Mokokchung, 7 Nov (TYO): All Ward Union Mokokchung Town (AWUMT)-i 7th Nov, 2021 nü tang teyangludak NH-2 lenmang Mokokchung town ajanga süiba tesemtem repranga jajaogo. AWUMT tir Limanungsang-i anir par külem ketdangsurtemi Executive Engineer National Highway Mokokchung Division den par külem tenzükertem aser contract agizük Trident Enterprises ketdangsurtem ajurua lenmang dak sentakba nung inyakdaksünubattem shiogo, ta osang ajanga metetdaksü.

Iba telungjem mapang parnoki lenmang yanglutsü aliba tesemtem nung lenmang ulushitsü aliba, tetsüng lenmang aser kilentsü/tzü aolen (nallah) yanglutsü nungdakba tesemtem reprangteta tim mapatem inyaksü bangjemtepa liasü, ta osang ajangasa ashi.

Kasa mapang AWUMT-i contractor dang lenmang aser nungdakba maparen tajungtiba nung temulung agüja aser nüburtemi mamateti amshitetsüsa yanglutsü shiogo aser iba dak sentakba nung contractor-ia ajungben koda masüba timtem majangshira

tekaratiba aser tajungtiba nung renemtsütsü shiogo, ta osang ajanga metetdaksü.

Mokokchung Deputy Commissioner-i sangdonga aliba ama NH-2 lenmang Km 117 (Sewak Gate) nungi Km 156 (DEF) Mokokchung tashi shirnokisa gari lenmang anasa kisü-jensü oset balala den gari tejen anena yua lir, itemji tekaratiba nung belentsü/ainshitsü asoshi AWUMT-isa nenshia metetdaksüogo. Arok agitsü inyaksangshiba mapa nung nüburtemi amaliteptsü mepishir, ta AWUMT-isa metetdaksü.

FAC nung DCA course renemer tushia liasü



Dimapur, Yimpoksüi/Nov. 07 (TYO): Fazl Ali College (FAC), Mokokchung kübok Department of Computer Science ajanga Diploma in Computer Application (DCA) takok ngua agitetba mezüngbuba aser tanabuba batch kaketshir nem tenüngsang agütsüba sentong ka November 6, 2021 nü ayongzüka liasü.

FAC indang Conference Hall nung iba sentong ya agiba mapang N. John Kuotsu (HOD aser Asst. Prof., Dept. of Computer Application) ajanga

tarur pela agizükba o jembi aser Department of Computer Science, FAC ajanga agütsüba DCA course indang rateta shia liasü.

Arenla R. Aier, Vice-Principal, FAC ajanga takok anguba kaketshir nem tenüngsang agütsü aser ano Department of Computer Science ajanga mera tali agia extension service ka ama Computer Certificate Course agütsüba atema pelaba lemsatepa liasü.

Tanü puti nung Information

Technology wadang nung mashi-memetet alitsü ya tamakoktsü kumogo, anungji kaketshirtemi pei shisatsü aser sempet tajungtiba nung amshitsüla, ta ayongzüka liasü.

Iba course tembanger kaketshir 26 rongnungi Krishna Kumar ajanga iba course agiba mapang ajangshibatem lemsatep aser department-i maongka agütsüba atema pelaba ashi.

Lanunungsang (Asst. Prof., Dept. of Computer Science) ajanga melepzüng o jembia sentong tembanga liasü.

Security Forces temi Lungwa nung NSCN-K (YA) züngsem ka apu



Dimapur, Yimpoksüi/Nov. 07 (TYO): Security Force temi Police den lungjemer November 3, 2021 nü Mon district kübok general area Lungwa yimdak

operation ka agiba mapang NSCN-K (YA) züngsem ka pua liasü, ta sangdong ka ajanga ashi.

Osang tejangja ka nung ajemdaker Security Forces temi

State Police den lungjemer operation ya agiba mapang Konyak Region nung ozüng alema senotsü saruba maparen balala nung shilem agir NSCN-K (YA) züngsem ya apu.

Pa ya Myanmar nung NSCN-K (YA) indang camp ka nungi Mon district kübok general area Lungwa yimdak iba maparen ya inyaka liasü.

Iba ken o maneni bushisingdangtsü atema pua alisang ya Mon Police Station nem agütsüogo, ta sangdong ajanga ashi.

NSCN/GPRN ajanga asükhu lemsatep

Dimapur, Yimpoksüi/Nov. 07 (TYO): Shepoumaramth Region kübok Chowainamai Khullen yimsüing nungi NSCN/GPRN indang Razou Peyu, H. Daihrii mapang talangka shiranga arur November 6, 2021 nü asüba asoshi Government of the People's Republic of Nagalim (GPRN) ajanga mangyim tejashi lemsateper, ta NSCN/GPRN indang MIP sangdong ka nung ashi.

Pa ya May 19, 1958 nung

Naga linük tenzüka wadang nung tenüng zülüok aser mapang talangka tenzüker mapa nungi anisüngzüka liasü. Iba sülen Razou Peyu ka ama NSCN/GPRN nung February 25, 2017 nung dena liasü aser tasünü tashi bendanga agütsür Naga lima tenzüka aruogo, ta sangdong ajanga ashi.


Pa asüba ajanga tawa adokba kanga jangja metettsü aser iba tawa asüngtsü tasak asütsü. Pai anibelem mesasai Naga lima

ajungtsü atema inyakba asoshi pa tenüng Naga nunger otsü nung alitsü aser tarutsü anogotem nung teti bilemettsü.

Asür H. Daihrii-i toktsür aoba mangyimer kobong aser kinungertem den NSCN/GPRN ajanga asükhu lemsateper aser Tulusang Tsüngremi par kibong nem tesunep agüjang, ta sarasademtsür. Asür tanüla teti tatem maka tesunep nung anisüngzükjanga, ta sangdong ajangasa ashi.



Mokokchung district kübok Ungma nung NH-2 anasa Hindustan Petroleum Co-operation Ltd. filling station ka November 6, 2021 nü Sales Officers Jorhat sales Area, Sijou Swrjee-i semzükja liasü. Noksa nung iba station kibur Tinu Imsong den sales officer aser station indang staff tem angur.



Office of the
AO SENDEN LITERATURE BOARD (ASLB)
MOKOKCHUNG – 798 601
NAGALAND
Reg. No HOME / SRC-6703

Ref. No. ASLB/AT-05/2020-2021

Anogo: 08-11-2021

ASLB SANGDONG

Taoba mapang sangdonga aliba ama Ao Senden Literature Board-i achaayanga agiba Arangtet Tatidang PGDT-703 atemertem Dissertation zülüa renemer dang iba PGDT Tenren tempangeter. Iba den dissertation zülutsüpur Methodology tesayuba mangazüki Dissertation zülutsü memelara. Anungji shirnoksa Aenjeti (Jan) 2021 tashi nung AT.PGDT-703 temer ali aser Yimpoksüi 24-26, 2021 tsüngda Arangtet Tatidang agütsüsupur PGDT-601 nungi shir temalen ajak Yimpoksüi 12, 2021 anogo 10 ako nungi iba sayuyim sentong nung adentsü metetdaksür (Kar iba angazükren nung medenra aser medeni lira pa/la Dissertation zülutsü memelatsü).

1. **Tesem** : Ao Senden Kilem, Sangtemla Ward, Mkg.
2. **Tesayur** : Dr. Lanurenla (FAC) & Dr. L. Temjen Jamir, Chairman, ASLB

TEMETETTSÜ :

1. Iba sentong nung adentsüpur ajak nungzülu taah (Registration fee) Rs. 500 agitzü aser Pokmen ASLB-i agitsü.

Sd/-

Rev. Rongsen Longkumer
Convenor, ASLB/AC

Sd/-

Dr. I. Temjen Tzudir,
Secretary, ASLB/AC

TEPELA OSANG KA LEMSATEPER

-Rev. C. Walu Walling

Dimapur lima alir Aor Ordained Minister ya tenteta akaba telok ka masü, saka Mungdang aser arogotem yaritsü tensa aser mapang ajurudang külemi adenshir shisa agitepa, aser sarasadem khuret bena shisa lemsatepba telok ka. 2021 küm nungi ABAM Clean Election Movement tenzüka joko sentong balala agia aoba mapang. Aolima kodaser Election merükteta agitsü ta asüba khuret lemsatepa arur November 4-5, 2021 ABAM den jembiteper Ordained ministers tenüng nung nisung pezü: Rev. Dr. Kari Longchar, Rev. Dr. Temjen Pastor Indisen, Rev. Lanu Pastor Diphupar "B", aser Rev. C. Walu Walling, November 4 Dimapur nungi apusoa Impur nung lenirtem den sensaksem tajung ka liasü. November 5, 2021 Mokokchung Town Town Süngkomen Baptist Arogo Meeting Hall nung civil society ajak nungi lenir aser yimsüsürtem jaoka ABAMCEM ajanga mensem tajung ka nung onoka densema liasü. Iba mensem nung Ordained ministers tenüng nung Rev. Dr. Kari Longchar ajanga Ao kin kechi jenjang nung tanü noktaka lir; Election ajanga Aolima raksatsüba nungi kodaser asenek teka amteper ibai merükteta agitsü ta asüba nungi tensa aser mapang den tapet tayongzüka o lemsatepa liasü.

Dimapur lima alir Ordained minister mensem ajak nung Dimapur Ao Baptist Arogo ajanga meeting Hall melaba den chia ajemtsü ajak peria agüja aruogo. Tan November 4-5, Impur-Mokokchung tur alutsü asoshia Arogo Ghari den Gharinir, aser oli aruli nung nungdak agütsüba atema kanga pelaba lemsateper. Iba den Indisen Baptist Arogo aser Diphupar "B" Baptist Arogoi Sannüker nübu melaba den lenmang nung chia ajemtsü peria agütsüba atema arogo ana danga kanga pelar.

ABAMCEM takok mangu tashi Dimapur lima alir Aor ordained minister ajaki khuret bena aser sarasadem aser shisatsü agi nongita yaritsü lemtetba ama tanji mezüngbuba jenjang agiogo. Tarutsü mapang aser anogotem atema ajaki Aolima Election merükteta agitetsü sarasadem nung maneni yaridi.

Nukshiyim nung metsüjang alemba sentong agi



null, Nagaland, India

Dimapur, Yimpoksüi/Nov. 07 (TYO): India nunger nüjiso ngur küm 75 ajungba "Bharat Ka Amrat Mahatsav" nüngtem nung ATMA, Changtongya Block, Mokokchung ajanga Nukshiyim yimdak November 04, 2021 nü Kissan Goshti aser 'Field Day cum distribution of Winter vegetable seeds' sentong ka ayongzüka liasü.

Iba sentong nung shisalen sayur Temsutola Jamir Btm, Changtongya, ATMA

Mokokchung ajanga kibong rongsenketzüng ajungkettsü atema tetsürtemi aonsotsü lu ayimtsü tongtipang indang nung jembi aser lokti sensaksem akaba mapang

sentong nung shilem agirtemi aonsotsü lu ayimer ka ama ajangshibatem lemsatepa liasü.

Field Day nung shisalen sayur Toshiarenla T. Longkumer, ATM aser Tajungsola Jamir, ATM, Changtongya block ajanga mongpu mapang metsüjang anepaluyim, alu renemba, metsüjang atemba, tawa mekazüka ayuba, tzü mesüokba, alit emu amshiba aser mesen aser shiruru azüokba yimyatem sayua liasü.

Iba mapang Frontier's FSG aser Mulongtuk FSG nem metsüjang agüja liasü. Iba sentong nung aluyimer 15 arua dena liasü.

CBI-i taoba Assam CM Hiteswar Saikia'er jabaso apu



Taoba Assam chief minister Hiteswar Saikia'er jabaso Ashok Saikia-i osangbenertem den jempiba noksa nung angur. (File photo)

Guwahati, November 7, 2021 (Agencies): Deobarnü Central Bureau of Investigation (CBI)-i taoba Assam chief minister Hiteswar Saikia'er jabaso Ashok Saikia puogo. Guwahati kübok Sarumataria nung par ki mita aoba sülen CBI ketdangsürtemi Ashok apu.

Iba ken o ya 2001 küm CBI nem bushisüngdangtsü atema agütsü aser 2013 nung CBI-i Ashok Saikia aija liasü.

Taoba chief minister Hiteswar Saikia'er jabaso Ashok-i okadak temepishiba ka agütsüba sülen jenshia aru.

November 9, 2021 nü pa special CBI court tsüngdangi anir aotsü.

Ashok Saikia-i bank nem sen agütsütsü aliba ajak agütsüogo ta shia bank indang statement ka sayu.

"Ashok Kr. Saikia, Director, HPS India Pvt. Ltd-i Assam

State, Co-Operative Agriculture and Rural Development Bank Ltd nungi sen apu ta kuli agütsür" ta bank statement nung shia lir.

"Pai 1996 küm Bridge loan scheme kübok Rs. 9, 37,701.00 indang loan agi. 14.09.2011 nung angatettepba ama pai sen principal aser interest ajak agütsüogo. Iba loan tembangogo" ta bank statement nungsa shia lir.

Iba statement ya October 10, 2015 nü agütsüba aser General Manager in-charge, H.N. Borah-i sign süa lir.

Indian Panorama of IFFI atema Northeast nungi film pungo shim



Guwahati, November 07, 2021 (Agencies): Indian Panorama of the International Film Festival of India (IFFI) atema Assam nungi feature film asem aser non-feature film ka densema film pezü shimogo. Iba festival sentong nung, feature section nung Aimee

Baruah indang Semkhor (Dimasa), Biswajeet Bora indang Boomba Ride (Mishing) aser Vishal P Chalia indang Sijou (Bodo); aser non-feature category atema Kishor Kalita indang documentary film Veerangana shimogo. Award anguba Semkhor film

ya Dimasa oshi nung yangluba film ka asütsü, kong Semkhor nung alir nüburtem sobaliba aser yimsü indang otsü sayur.

Item film dak alaka, Haobam Paban Kumar-i yangluba Manipuri non-feature film ka iba festival atema shimogo.

Paban Kumar indang documentary Pabung Syam (Manipuri) ya non-feature section nung shimogo.

Item film ya 52buba IFFI sentong nung sayutsü. Aruya aliba sentong ya November 20 nungi November 28, 2021 tashi Goa nung agitsü.

Iba festival sentong ya Directorate of Film Festivals of India, Ministry of Information & Broadcasting den Goa Sorkar longjemer ayongzüksü.

Panbazaar nung traffic police ana dak azük

Guwahati, November 07, 2021 (Agencies): Guwahati kübok Panbazaar tesem nung lanur trok agi traffic police ana amak.

Panbazaar tesem nung lanur trok agi Guwahati Traffic Police department indang ketdangsür ana dak azük.

Iba inyakyim dak sendakba nung lanurtem anema FIR benokba sülen, Police-i par trokprongla puogo.

Honibar aonung, parnok (lanur) rongnung nisung kati gari kara aniba ajanga traffic police ketdangsür anati parnok mena aliba gari anentsüba

mapang, iba lendong ataloka liasü.

Tatsüka lir, lanur yagi par medemer pungo shi ayongdener kasa tesem jagi aru aser parnoki traffic police anaprongla dak züka liasü.

Iba lendong nung adener police ana ya Panbazaar Traffic Police indang Ritupan Saikia aser Latasil Traffic Police indang Utpal Gohain ta jangjaogo.

Osang ajanga angazükba agi, lanur trok rongnung kabo Panbazaar police station, Guwahati nungi police nung inyaker jabaso lir.

Congress MLA timbaka BJP nung adentsü: Bhabesh



Assam BJP chief Bhabesh Kalita (File photo)

Guwahati, November 07, 2021 (Agencies): Assam BJP chief Bhabesh Kalita-i ashiba agi, State nungi Congress MLAs timbaka BJP telok nung adentsü atatepdar.

"Congress MLAs timbaka telok nung adentsü atatepdar. Taruba anogotem nung Congress MLAs timbaka iba telok nung adentsü," ta Deobarnü Assam BJP chief Bhabesh Kalita-i ashi.

Assam Congress president Bhupen Borah-i, tanga party nungi MLA tem meima bener aotsü melen, State nung terenlok maparen tsütsü temulung agütsür inyaksü asoshi BJP dang shiogo.

"Tanga party indang MLA tem meima bener aotsü melen,

BJP-i State nung terenlok maparen atema rangloker inyaksüla," ta Assam Congress chief Bhupen Borah-i ashi.

Deobarnü, Assam BJP president Bhabesh Kalita den chief minister Himanta Biswa Sarma nati virtual ajanga New Delhi nung agiba BJP national executive senden ka nung dena liasü.

Oaang ajanga angazükba agi, Congress party indang MLA ana - Rupjyoti Kurmi aser Sushanta Borgohain nati taküm küm tetenzüklen iba party toksür BJP nung denogo.

Tatsüka lir, Kurmi aser Borgohain napronglai tanaben BJP nung aden aser pei pei tata constituency nungi by-election takok ngua liasü.

Assam-Mizoram arrtsü anasa bomb ka angu

Silchar, November 7, 2021 (Agencies): Cachar district kübok Khulicherra nung crude bomb ka anguba sülen Assam-Mizoram arrtsülen tensa raksatsüsa mapang ka ajurua lir.

Honibarnü Khulichera nung mapa inyaker kari crude bomb ji angu.

"State ana arrtsü anasa Khulcherra nung tang apu ka teyangludak lir. Iba apu anasa kilentzü ayimdak iba tapoktsü yua liasü aser detonator ka sendaka liasü" ta Cachar district superintendent of police (SP) Ramandeep Kaur-i ashi.

Guwahati nungi forensics experts telok ka Silchar-i aotsü aser crude bomb jangjatsü. Iba bomb anguba sülen

Khulichera nung security akangshiogo.

Assam-Mizoram arrtsülen taoba mapang bomb aika pokdaksüogo.

Taoba ita police outpost ka anasa bomb apokba atema Assam police-i Mizoram police ka apu.

Mizoram police Laldintwanga ya Indian Reserve Battalion (IRBN) personnel lir aser Bhairabi nungi lir.

"Onoki bushisüngdanga aodang Mizoram nungi nisungtemi tapoktsü pokdaksüba bushitet. Iba bomb pokdaksüba atema onoki Mizoram senso ka puogo" ta Hailakandi SP Gaurav Upadhyay-i ashi.

**GOVERNMENT OF NAGALAND
DIRECTORATE OF HIGHER EDUCATION
NAGALAND: KOHIMA**

No. HED/SCHO-1/2016/ Kohima, dated the 5th Nov. 2021

NEC MERIT SCHOLARSHIP

It is hereby informed to the students pursuing Diploma/Degree/Post Graduate/MPhil/PhD course that the North Eastern Council (NEC), Ministry of Development of North Eastern Region (DoNER), Government of India, Shillong is offering NEC Merit Scholarship to the eligible candidates of the North Eastern States. Interested candidates can visit the National Scholarship Portal (<https://scholarships.gov.in>) for detail guidelines and online application.

Breakup of scholarship quota for Nagaland and scholarship amount

Level of Study	No. of quota (Fresh)	Amount
Diploma	18	20,000/- p.a.
Degree	120	22,000/- p.a.
Post Graduate	48	25,000/- p.a.
M.Phil/PhD	6	30,000/- p.a.
Total Scholarships: 192		

Last date for online application : 30-11-2021
Last date for Institution verification : 15-12-2021

Sd/-
(Dr. APENI LOTH)
Director, Higher Education



TIR YIMYIM YIMOBILEM (EDITORIAL)

DIMAPUR TENTONÜ, YIMPOKSÜ (NOVEMBER) 08, 2021

Nübor nüchi kümstsüba

Nagaland nung tang tasenba district, Noklak nung Superintendent of Police, Dr.Pritpal Kaur-i tetsür aluyimertem kar anidena chiyongtsü aser temang asoshi nungdakba sapon aser tokolak alokba shampoo ama yanglua company nung alepba ama jungjunga aleper ayoktsü tenzükdaksüba mapaji, pei office mapa dak alia awaa oa nübortem mesensaki anisüngzüka lidaktsütsü asoshi apiteta inyaksüba mapa tajung ka asütsü. Atangji, district shia nung administration nung asüyonga mesüra police mapa nung asüyonga anogo shia mapa inyaker meinyakma adoker, anungji office mapatem dak alia awaa oa tanga mapa inyaksüba mapang madoker aser aikati tebilema mebilemer. Ano, office balala nung tokolak aser lenirsa asüyonga, ajak kasa masü, karibo pei department ajanga nübortem asoshi inyaksütsü latettsüba sentong dena meinyakner, anungji aiben mapa inyaksü yokba tesem nunga malir. Ano, karibo nübortem nungdak repringteta talila inyaksütsü melen nübortem asoshi lemzüksüba shilem dena chitsür. Ano, ketdangser karibo inyaksünüyonga mashi memetet aser tapiteta mapiteter. Ano, ketdangser aikati mapa teinyaksü makaji ta ser kecha meinyak kazüa amonger. Ajisüaka, government mapa nung ketdangser, Dr.Pritpal Kaur amaji nübortema meimer aser temetetba meteta lir ta asüba purtemi pei office mapa alema oa awaa oa nübortem shisa tenük lapokja mapa inyaksü sayuba aser yariba ajanga nübortem nüchi kuma jangratema alitsü tenzükter. District ka nung police officer ka mapaji temzüng ozüng shitak amshia ozüng raksartem azioktsüba mapa lir, anungji pa mesüra la alidak nübortem mapa inyaka mashi aser chiyongtsüa maka timtema alirtem yaritsüba police officer ka mapa masü. Ajisüaka, Dr.Pritpal-i police nuk agi masü saka la temeim nuk agi Noklak nung alir, talisa tetsürtem dak pei lima nung züsentetba aser arem süngo aser süngjang agi tagitsü rongsen tulu kuma yanglutetsü tashi aser nungdak repringtetbaji, pei teinyaksü tata shilem nungi ano talila mera agia oa nübortem atongtsü aser yaritsü mulungtetba mapa ka lir. Tanü Nagaland ama Tsüngremi moatsüba nübo aser ali rongsen agi tagitsü kuma meinyaketba lima nung government nung tulus aser ketdangsertemji nübortem asoshi maparen tapu balala nung missionary kaka lir. Iba khuretji meteta kodang government mapa nung inyaker tulus tilar nati pei alidak nübortem yaritsü mulungtetdir, idangjiang Nagaland nung alirtem liromedema tazungba aser temetetba nung aser tagitsü mapa inyakba nung renloka aotsü. Küm ishika jakdang, Mon district kükok tesem ka nung Wb.Sentilong Ozüküm EAC inyakba mapang nunga, pai aiben school-i orr tanurtem dang onko sayua liasü ta angazük. Nagaland tesem tezülen ka, kaketreju nung tesayur mapa agütsü nunga tesayur aikati mounüdak tesem ka nung EAC kati tesayur kümer sayuba mapaji, atangji, tulus kati nübortem tajung kümdaktsütsü asoshi aria bilema pei office aser pei mapa nungi meraa talila agia inyakba mapa ka lir. Ashiko, Nagaland tesem aika nung Dr.Pritpal aser Sentilong nung amaji, ketdangsertem pei tata mapatem nung temulung agüja inyakba dang masü saka ano pei alidak nübortem teküpbok jenjang nung aliba tia nungi anitetsü asoshi pei nübo, shisatsü aser rongsen agi awaa oa yaria alitsü imlar. Iba amaji ka meinyaki government mapa nung inyaker kar danga pei mapa inyakdaka melii nübortem akoksadakja lira, ibaji nübortem anitetsü melen nübortem ajemoka toktsüba mapa ka asütsü. Parnok dangjibo Tsüngremia mepelatsü. Joko, mapang tatsüka tsüngda nung Noklak S.P-i mapa inyaksü sayuba ajanga, tangbo Noklak nung tetsürtemi bendangleni dena bener oa ayoktsüsa shi lon, sapon, süngjang tzü balala aser tokolak aloktsü aser tejak nung anütsü mozü dena yanglu tenzükogo. Aji oda, joko Noklak nung alir tetsürtem yimtsüng shia nungi anidena Society ka kumtetter, parnok züsentetba aser yanglutetba chiyongtsü aser osettem nungji parnok society tenüng ajenloker ayoker. Iba jagi alimai Noklak meteta kumogo. Iba sen jagi parnok chirnurtem kaketrejui yoker aser kibong mesür. Ibaji government nungi senotsü aika agüja project ka tenzükba agi masü, mesüra subsidy anguba agia masü saka police tanishir tetsür kati kenü la alidak tetsürtem teküpbok tia nung aliba ngur, parnok nüchi kümdaktsütsü asoshi mapa inyaksü lenmang tilala sayu tenzükba ajanga atalokba osang tajungtem lir. Aji oda, Nagaland ama nübortem nüchi kümnüseta mekumtet aliba lima nung, government mapa nung tulus aser ketdangsertem anogo shia pei wadang nung nokdak dang, ni akatsü atema kechi inyaksü ta masü, nübortem kadaktsütsü atema ni' kechi inyaksü ta bilema inyakra, atangji, ajak akatsüsa Tsüngremi shisa tenük lapoka len sayutsü.

OLEMSABANG

Mungdang aser arogo tenzükba nung shisadangtsü olen kar

- L.Kika Pongener

ABAM Executive Secretary & Secretary-tem shimyim : Iba kasa onuk ya tamalen lenir kari olemsabang nung lemsatepogo, iba den semloka ni kü tangatetba kar lemsatepnur. Tarutsü nungbo ABAM Executive Secretary shimdang, ABAM nung Secretary-tem rongnung Seniority apir ka nem Promotion agütsür inyaktaktsü nungbo, nubusen bushiyim nunga timtem malitsü aser inyakyim nunga tetsükdaksü meli-i inyaktaktsü. Ano Secretary ya-a arogo nung Pastor sodi agir alirtem rongnung kar shima inyaktaktsü nung tajungba asütsü. Mungdang ka nung department tokolak mapa abentsüba Theological Knowledge-a tulu nungdaker, ano arogo inyakyim nung takotet 'Experience' akaba nubu asütsüba kanga tongtipang. Theology degree tulu liaka college züngzükli indang-indanga mungdang mapa nung inyakra, küm ishikabo inyakyim meteta akümtsüba mapang agidang, mungdang mapa aisu nung tamakok alutsü. Anungji Pastor mapa nungi anener alir kar shima inyaktaktsüba tajungba asütsü. Ibaji tetsükdaksü malitsü atema arogo/mungdang tenzükba nung arishi küm roker (60yrs) nung sodi agütsüba ya meyipa repringshitsüla. Tsüngrem tenzükba mapa nungbo tenzükter jagi tashi-ita tenzükterba tashibo tenzükdaksü nungang tajungba asütsü ta bilemer.

Pastor & Toklang tenzükter shimyim : Iba kasa onuk ya tamalen lenir kari olemsabang nung lemsatepogo, iba denji semloka ni kü tangatetba kar lemsatepnur. ABAM kükok arogo nung Pastor shimdang ABAM-i dang shimdaksü nung tajungba asütsü. Akok asübo danga toklang tenzükter dena ABAM-i shimer yoknung kanga ajungtsü. Kodang arogo nung Pastor/Toklang tenzükter kar shimtsüsa kümdir, arogo-i tazungba degree koba aginur, komala nubu aginur aji ABAM Executive Committee/Church Advisory Board nem agütsütsü, aser parnoki tetemsa nubu shimer yoktsü. Yamaji inyaknung, arogo nung Pastor/Toklang tenzükter shimba nung tsükong, yimer, kinunger apia shim ta...nungsen jembiba makatsü. Ano kanga tongtipang kaji, tanü Christian-tem rongnunga denomination aika lir. Lai puti ratetyim/sayuyim kanga bilemdanga inyaksüba meshitetba teshisadangtsü aika lir. Arogo nung kar dak alaka ajakibo ibala knowledge-ji meteta malitsü sudi, saka kodang tenzükterji ABAM-i dang shimer yokdir ibala tebilemtsüji makatsü ta bilemer.

Pastor-tem arogo balala nung melentetsü: Iba kasa onuk ya Tir Yimyim "Koma Sula" nunga shisa lemsatepogo. Tanü arogo nung iba ya kanga tongtipang onuk ka kumogo. Pastor/Full time tenzükter karbo arogo ka nung tang küm ter-metsü (10-20 yrs) tashi maneni tenzükter-a lir. Aji oda, küm aika tenzükdangji tenzükter ajak kasa masü, karbo nuburi kanga lakteter. Tanü arogo nung ibala tebilemtsü ya kanga aliba agi iba onuk ya bulua jembir asütsü. Atangji, arogo ka nung tang küm aika tenzükra, karibo arogoji pei meyong amai 'Kibur' akümer. Ano shir aküm nung jenoker alinung nungdakba ajak peria, taginuba ajak tongteta, sadem-sadema alitsü aji jungjunga chiteta-adoker, aser Tsüngrem dangbo akümdong nisungtem-jiang tongtipangba sudaktsür. Ajiser, akümdong nisungtem jagi tuyuba (directive) nung arogoji anitsüsa akümer, aser idangji nubur aika metsüdaker. Ano Pastor-tem arogo balala nung melentepa (transfer) tenzüksüba, practical nung bilemdangra, itasen atema tetsükta tsü tulu asütsü, kechiyong Pastor itasenji arogo ajak nung kasa masü. Aji oda, Pastor-tem itasenji ABAM-i agütsünungdang takoktsü lenmang lir. Kokrabangla, arogo nung pei arogo itashia aruba 'Income' nungi percentage (%) kar agiteter ABAM dangi yoktsü, ajiser ABAM-i acha-ayanga Pastortem ajak liromedema itasen agütsütsüsa inyaktetnungbo takoktsü lenmang lir. Ano arogo nung Pastor/Full time tenzükter, arogo ka nung dang küm talangka tenzükba agi nuburi laktetba tebilemtsüji makatsü atema tajungtiba inyakyim kaji, Pastor/Full time tenzükter ka mapa nung join sur küm pongu shia...i.e. küm-5 buba, küm-10 buba, küm-15 buba nung...Pa/la tenzükba jagi arogopur mulung asür asü masür (?)...ta repringshitsüla (Performance). Ajiser, pa/la mapa jagi arogopur mulung sura, ano tanabuba küm-5 sukloksütsü, saka pa/la mapa jagi arogopur mulung mesura sodi agüjadoktsü. Yamaji inyaktetra küm talangka tenzük-aka, nuburi laktetba tebilemtsüji makatsü ta bilemer.

Mungdang & Arogo nung tenzükter atema tarutsü tia : Tanü asen lima nung mungdang/arogo nung tenzüktertem tarutsü tia repringdangra, tenzükter ajakbo sempet kasa masüji kar asoshi kanga timtem asütsü, kechiyong mungdang/arogo-ia tashi-ita alidangang aginur, saka kodang pojim kümdir kecha nunga mamshitsü. Aji oda, chirnur tajung alir, apuani sorkar mapa nung alir kar dak alaka, haji-hakok kümer karbo kanga tim-atemtsü. Arogo nung küm aika sannuker mapa nung, mission mapa balala nung tenzükra aruba tain karbo temeimtsü-ka kanga ala-ashia timtemer arishi tempangba nguogo. Anungji mungdang/arogo nung tenzüktertem tarutsü asoshi mapa karbosa inyaka meyütsüra kar asoshi kanga timtem asütsü. Atangji, tang inyakba yayim nungsa ora, tarutsü nung Aotsür-Aor lanurtemi Tsüngrem tenzükner kata malitsü, kechiyong tanü alima tejakleni aoba putu ka nung, Tsüngrem tenzüktertem alima putu den jangyu medema alitsü kanga tasak. Aji oda, tashi-ita alidangbo itasen dalang ngua tenzükterji kangabo timtem malitsü, saka tarutsü asoshi rizünga ayutsü lenmang kecha makara, parnok tarutsü tiaji koda asütsü...??? Tamalen lenir tajung kari tangar lima nungbo mungdang/arogo nung tenzüktertem pension agütsüba, iba olemsabang nung lemsatepba züngshio. Aji oda, tangar lima nung inyaktetra, asen lima nunga inyaksü takoktsü lenmang lir amai bilemer. Kokrabangla, lim arogo nung ajungai pei arogo itashia sen aruba 'Income' nungi percentage (%) kar agiteta ABAM dangi yoktsü, ajiser, ABAM-i 'Pension Scheme' atema Bank account balaka lapoker inyaknung ajungtsü sudi, kechiyong iba mapa ya arogo nung khuret bena meinyakra, danga lenmangbo kacha mali. Aji oda, sorkar mapa nung tenzükter pension agütsüba amaibo magütsütetsü sudi, saka kangabosa tim-medemi kibong mesua litetsüsa teyari tilakabosa agütsütsüla. Mungdang/arogo nung tenzükter mapa nungi anendang 'Gratuity' tera agütsüba dak alaka teyari kecha mali. Anungji parnok tarutsü tia atema teyari lenmang kecha makara lanur putu asoshi kanga timtem tulu asütsü ama pongmanger.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

LBCD nung Graduation aser World Sunday School Day among



November 07, 2021 nü Lotha Baptist Church Diphupar-i World Sunday School Day aser Graduation sentong repsema agiba anogo nung Sunday School graduates 21 den tesayurtem tangokba noksa nung angur.

Dimapur, Yimpoksüi/ November 07 (TYO): November 07, 2021 nü Lotha Baptist Church Diphupar nung World Sunday School Day amongba den külemi Sunday School graduates 21 nem tetushi agütsü.

Iba anogomong sentong nung LBCD Pastor, Rev. Limhathung Lotha-i Sunday

School graduates atema temoatsü meshia sarasademtsü aser parnok nem graduate certificate den Temeshi Lai kaka lema agütsü.

Sunday School tesayur, Superintendent, Rhonbeni Lopilo Lotha-i 'Shisa tebulu, tetsübu saka Tsüngrem dak tamang akatsüla' ta asüba onük nung Tsüngrem O jembia liasü.

Iba anogomong sentong nung Sunday school tanurtemi ken aten, Lai azüng aser tsüngsanga liasü.

Sunday School Superintendent, Rhonbeni Odyuo-i Lai azüng aser Associate Pastor, Yimstu Yanthan-i sarasadem. Deacon S.C.Jami-i sentong tenzüka sarasadem aser Associate



Dimapur Ao Baptist Arogo nung 2021 küm Sunday school nung graduate asür 209 rongnungi kar yangi angur.



November 07 among nü Dimapur Ao Baptist Arogo (Merali) nung Alima Sunday School mong sentong agiba mapang tanurtemi shilem agiba noksa nung angur .

ANO GO ABEN TSÜNGREM DEN

Temeshiba metsü prokba

Saka temeshiba prokeri chichiba sempet angur. A.Shin 11:18b

Asenok taküm kümzüka alitsü lemanng aika lir saka temeshiba asoshi asenok sasa bendanga agütsüba nung sempet tulu agütsüba danga lemanng kecha nunga mali. Asenok jenjang ajak Tsüngrem temeshiba sayutsüla aji tekümtet ajanga asenok meyong lir: asenok tebilemba temeshiba asoshi bilemba asütsüla, idangji asenoki kechi bilemer aji Tsüngrem chir asoshi mapet masütsü; asenok mapa, indangji asen takümi temeshiba Tsüngrem ka tenzüker ta kuli asütsü; asenok tsüngchiba, indangji asenok tesendaktep ajak nung shingai mashishitsü.

Ne taküm nung nai Tsüngrem temeshiba sayur asü? Temeshibaji nai ne taküm nung mapa inyaksü melaba lir. Temeshiba bilemba metsü proktsü melen, nai tebilemba nung tamajungba aser temenen tebilemba indaktsür asü? Nai shi jangraba menokdangi mesüra tatok magütsütetba ne taküm nung lidaktsür asü? Yisui ashi asenok Tsüngrem aser Pa temeshiba tema bushira Pai bendenloktsütsü (Matt. 6:33).

Temeshiba metsü prokba nung sempet tulu lir. Tang nai ne taküm nung metsü proktsü sentong lir? (1 Peter 1:15). Ne tebilemba temeshi asütsü asoshi nai ne kolok nung temeshiba koda ayur? Na tsüngchir süa alitsü asoshi ne tesendaktep nung temeshiba koda arur? Asüng nai ne taküm nung temeshiba aluruba kanüra, tanü nai temeshiba metsü azüngtsüla.



World Sunday school anogo mong nung Kohima Ao Baptist Arogo nung tanurtemi shilem agiba noksa nung angur.(Nov.07, 2021 .)



Mokokchung Town Baptist Arogo nung taküm küm graduate asürtem parnok 78 yangi noksa nung angur. Taküm 2021 küm ABAM kübok aliba arogotem nung Sunday school tanur ajak agi 4900 graduate süogo.

OLONG PAITEP # 5990

1				2						3		
4								5				
								6				
				7								8
		9										
										10		
11								12				
13												

TIPILEN	LANGTSÜNGLEN
2. Teka mapa tajung - (8)	1. Anepalua inyak - (7)
4. Anakshinüba - (5)	2. Teptsü - (4)
5. Süoshi agi tazü - (4)	3. Nok agi raratep - (6)
9. Aria bilemtep - (7)	6. Kibong aküm - (4)
11. Ajemalu ozü - (4)	7. Nüji masü - (4)
12. Tzü an - (5)	8. Taruba küm - (7)
13. Teben teloktep - (8)	9. Teka shidok - (6)
	10. Meputep/Mapet - (4)

OLONG PAITEP # 5989 TELANGZÜBA

TIPILEN :	LANGTSÜNGLEN :
1. Yimlibilem, 4. Anak, 5. Tangar,	1. Yongya, 2. Moko, 3. Marok,
7. Aya, 8. Arong, 11. Par,	5. Teronem, 6. Nung, 8. Amajok,
13. Lemjem, 14. Oagi, 15. Mulung.	9. Jangzü, 10. belem, 12. Rong.

ALOKBA NGUR TOSHIBA SÜNGMANGBA :

Toshi : Hai Alok asen lima ya sa ajangba tajungba aja.
Alok : Aitu, asen lima majangra asenok kecha mesütettsü.
Toshi : DC court ya Nagaland tsütsü ayusa tajungba aja na?
Alok : Aitu, joko moraloka aotsü mali Assam li ana nung lirjitu.
Toshi : Hai ni bilemba ajak naia mulunger, anungji na-a tangatetba kechi ali?
Alok : Oda nai ashiba agi nia memetetba agi ashir ati.
Toshi : Nenokji memetet ser nung mteter amai sayudang alima raksar ati
Alok : Kechi kuli agi aji ashir?
Toshi : Na tulur masüji asenok tilarbo Assam ajang majung, Assam police-i kanga timtemdaktsür. DC court-jia Nagaland tsütsü bushidang gari makartem tilartembo para nung aser anogo intokdang kanga timtemtsü, anungji memetet mashi alitsüba mapang masü angateter inyangma.
 Lilir: I. Jamir

TANÜBO NAI LANGZÜANG

Q. Koba tentet ajanga Greenhouse gas (GHG) bulletin saya?
 [A] NITI Aayog
 [B] World Meteorological Organisation
 [C] Food and Agricultural Organisation [D] NABARD
 _____ (Taruba adok nung onoki langzütsü)
YASHIADOK TELANGZÜBA : Coronavirus lineage

AO OSHI ANGAZÜKDAK:

TANÜ ANGAZÜKTSÜBA OJANG



Lemang
 (v) agütsüyonga aoba (share)
 * Tamburi tanuburtem dang senji **lenmang** ta ashi.
Lenmang
 (n) jajatsüba tesem (path, road)
 * Nagaland nung gari **lenmang** kanga majung.

Happy Birthday

TENÜNG : NUNGSHIMAONG
KÜM : 11
Anogo : 8 November
Talidak : Old Showuba
 Happy birthday MAONG
 Tsüngremi MAONGBA arishi talang den taküm temoatsü aser takok nung len aniang ma
 ~ From: Anoker, Tutu, & Benben



NAI-A YA METETTER MA

AMAZON PRIME NUNG SAYUTSÜ ALIBA MOVIE ASER SHOW KAR: NOVEMBER 2021

- The Electrical Life of Louis Wan - Amazon Original Movie
- Snowmance
- The Spruces and the Pines
- Pete the Cat - Amazon Original Series: New Episodes
- Tampa Baes - Amazon Original Series: Season 1
- Mayor Pete - Amazon Original Movie
- Finding You
- Always Jane - Amazon Original Series: Season 1
- Beginners
- Everybody Loves Natti - Amazon Original Series: Season 1
- The Wheel of Time - Amazon Original Series: Season 1
- Here Comes the Boom
- Hanna - Amazon Original Series: Season 3

SUDOKU # 6031

TELANGZUBA # 6030

			7	6		8			3	8	6	5	9	2	4	1	7
	4	5		8		3			1	7	4	3	6	8	2	5	9
3			5		4	6	9	1	9	2	5	4	1	7	6	3	8
	3		9		8		4		4	6	3	8	7	9	1	2	5
			2		7				8	9	2	1	5	3	7	4	6
			4	6	3	1		8	5	1	7	6	2	4	9	8	3
				7		1		5	7	5	9	2	8	1	3	6	4
5	1		4	9			3	8	2	4	8	7	3	6	5	9	1
2		6	3	1		4	7	9	6	3	1	9	4	5	8	7	2

OJANG LUTEP # 5577

NGJUA :
 YAINK :
 GJIYONA :
 SATSSHIÜ :
 ERÜKEMEMRI :
 GATANR :
 AKBINYA :
 NGNU :
 MULUTENG :
 MERMALE :

OJANG LUTEP TELANGZÜBA # 5576

TANGAR TAI APUTSÜ DANG MEMERANGI PEI JEMBIBA ASER INYAKBATEM ASADANGSHITSÜLA

TAN HOPTA ATEMA - KOMA SÜLA ?

Q. Akhidang ama, ABAM kübok lanurtem ya küm shia lanur mungdang (Youth Convention) ya Impur nung dang melii, tagizüker dang lira, yimtsüng aser town arogotem nung among nunga koma süla ?



November 07, 2021 nü New Delhi nung Union Defence Minister, Rajnath Singh BNP national executive committee senden nung adentsü atema NDMC convention centre tonga arudang tangokba noksa nung angur.

Centre dang angati ration scheme ita trok atsülangtsü mepishir

Kolkata, November 07 (Agencies): Amongnü (November 7) Trinamool Congress-i Centre sorkar dang Pradhan Mantri Garib Kalyan Anna Yojana (PMGKAY) kübok angati ration jang agütsüba scheme ano ita trok atsülangtsüla, ta mepishiogo.

Centre sorkari, November 30 sülen nungibo angati ration agütsüba anentsü, ta sangdongba sülen Delhi Chief Minister, Arvind Kejriwal-ia Centre dang iba scheme sangküm May ita tashi atsülangtsü mepishia liasü aser tang Trinamool Congress (TMC)-ia sorkar dang iba scheme ita trok atsülangtsü

mepishir. India nung coronavirus wara kanga mejungi prokba mapang yaküm March ita nung Centre sorkari iba scheme tenzüka sensakertem nem angati jang agüja arur.

Kolkata nung osangbenertem den jembidang TMC MP, Sougata Roy-i, iba scheme atsülangtsü atema pai Ato kilonser, Narendra Modi dangi shidi ka zülutsü, ta metetdaksü.

"Wara ajanga iba linük nung sensakertem tang tashi timtemdar, anungji iba scheme anenra sensakertem ano taliba timtemtsü," ta pai ashi.

November 5 nü Centre

sorkari, linük rongsenkett süng shia arudar anungji November ita sülen nungibo PMGKAY scheme magütsütsü, ta metetdakja liasü.

"Gari totzü jenjang kanga atuba mapang ka nung sensakertem kanga timtemdar, anungji sensakertemi states aser Centre dang nungi teyari nüngdaksü. Centre sorkari iba scheme anenra sensakertem timtem bendenloktsü," ta Roy-i ashi.

"Kobi melii ni Ato kilonser Narendra Modi dangi shidi ka zülua pa dang iba scheme ano ita trok atsülangang ta mepishitsü," ta paisa metetdaksü.

BJP-i Punjabelection nung menden ajak nungi tokteptsü: Ashwani Sharma

New Delhi, November 07 (Agencies): Amongnü New Delhi nung BJP national executive senden amenba sülen Punjab BJP Tir, Ashwani Sharma-i, taruba Punjab state assembly elections nung party-i menden ajak nungi tokteptsü, ta metetdaksü.

Sangküm küm tetenzüklen assembly elections agitsü aliba state pongu- Uttar Pradesh, Uttarakhand, Manipur, Goa aser Punjab nung chief minister tem aser state BJP Tirtemi party national executive senden nung pei state indang osang metetdakja liasü.

Osangbenertem den jembidang Union minister, Bhupendra Yadav-i, state pongu nungjagi party Tirtemi

party asalentong metetdaksü aser Chief Minister temi pei state nung sorkari inyaktetba mapatem osang metetdakja liasü, ta ashi.

State pongu nungi report metetdaksüba jagi Ato kilonser, Narendra Modi melung süa liasü aser pai, party lenmang shidak nung jajadar, ta ashi.

BJP national executive senden nung jembidang Modi-i, "BJP nung inyakeritemji nüburtem atema apu latsürtem asütsüla. Party nung inyakeritemi nüburtem den sendaktepba ajanga asenoki takok angur," ta metetdaksü.

Amongnü anepdang BJP Tir, JP Nada-i national executive senden tenzüka aser

Modi sorkari coronavirus wara anema junga raraba atema tenüngsang agütsü.

Nadda-isa, nisung kari Citizenship (Amendment) Act aitsür, ajisüaka kidanger linüktem nung minorities kümzüksü atema iba ozüng ya nüngdaka liasü, ta Afghanistan nung Taliban yimsüsüba ajanga kuli angur, ta ashi.

Paisa Jammu & Kashmir nung Arrla 370 agienba atema Ato kilonser, Modi aser Union Home Minister, Amit Shah na nem tenüngsang agütsü.

Nadda-i taküm December 25 tashi nung booth committee 10, 40, 000 alitsü aser booth level committe shia nung Mann Ki Baat sentong sayatsü atema asalentong metetdaksü.

India nung ano nisung 10,853 dak Covid putet aser 526 asü

New Delhi, November 07 (Agencies): India nung ano nisung 10,853 dak coronavirus putet aser iba tashidak agi shiranger 526 süogo, ta Amongnü Union Health Ministry-i metetdaksü.

Tang India nung coronavirus agi teshirangdakpur 1,44,845 lir aser ibaji coronavirus caseload nungi shilem 1 den tajemba lir. Iba ya yaküm March ita nungi tenzüka tang tashi nung

teshirangdakpur tajemtiba lir.

Tang India nung anogo shia coronavirus tendangba nungi positive putetba shilem 1.18 dang kümogo aser hopta shia positive putetba shilem-a 1.28 dang kümogo.

Tang tashi nung India nung samples crore 61.48 tendangogo aser coronavirus vaccine dose crore 108.21 agütsüogo, ta Union ministry of health & family welfare-i metetdaksü.

Punjab nung Congress sorkari petrol litre ka nung sen 10 ajemer

New Delhi, November 07 (Agencies): Anogo ishika tejaklen Centre sorkari petrol aser diesel jenjang ajemba sülen Amongnü Punjab nung Congress sorkaria petrol litre nung VAT saru sen 10 aser diesel litre ka nung sen 5 ajemtsü atema telemetba agiogo.

Amongnü Chief Minister, Charanjit Singh Channi leniba nung Cabinet senden amendang sorkari November 7 ayatern nungi tenzüka jenjang ajemer ayoktsü telemetba agi.

Chief Minister-i, gari totzü jenjang ajemba ajanga sensakertem khuret pungbatsü, ta ashi.

Jenjang ajemba sülen Punjab nung petrol litre ka nung sen 95 asütsü aser diesel litre ka nung sen 83.75 asütsü.

Punjab Chief Minister-isa, joko northern region nung Chandigarh Union Territory dak alaka petrol aser diesel jenjang dalangba state ji Punjab asütsü, ta metetdaksü.

State Finance Minister, Manpreet Badal-i, VAT saru ajemba ajanga state sorkari saru nung sen crore 6,000 shi takoksa angutsü, ta metetdaksü.

Taoba hopta Centre sorkari petrol litre ka nung excise duty saru sen 5 aser diesel litre ka nung saru sen 10 ajema liasü.



November 07, 2021 nü Chennai nung tzünglu sashia aruba sülen yimti nung tzü metsünga alidak nisung kar talongtsü ka nung atsüdaksüba noksa nung angur.

Nov. 26 tashi nung aluyimba ozüngtem agientsüla: Rakesh Tikait

New Delhi, November 07 (Agencies): Aluyimertem union balalai akümiba tentet-Bhartiya Kisan Union (BKU) nung tongti lenir, Rakesh Tikait-i Centre sorkar dang, November 26 anogo tashi nung aluyimba dak sendakba ozüng tasen asem agientsüla, mesüra aluyimertemi longkak tesashiba aitsü, ta metetdaksüogo.

Tikait-i pa indang official twitter account ajanga, Centre sorkar nem November 26 tashi mapang agütsür, iba sülenjibo November 27 nungi tenzüka yimtsüngtem nungi aluyimertem tractor nung Delhi temeket nung aliba arrtsülen longkak aitba tesemtem nung adenshia süki yanglushitsü aser longkak tesashiba aitsü, ta metetdaksü.

Yaküm November ita nungi tenzüka aluyimertemi Delhi arrtsülen Singhu, Tikri aser Ghazipur nung adenshia

longkak aitba sülen November 26 nü küm ka ajungtsü.

Aluyimertemi ozüng tasen asem agienang ta takhangba agüja longkak aiter. Aluyimba ozüng asemji - Farmers' Produce Trade and Commerce (Promotion and Facilitation) Act, 2020, Farmers' (Empowerment and Protection) Agreement on Price Assurance & Farm Services Act, 2020 aser Essential Commodities (Amendment) Act, 2020 lir.

Gari sadema senzütsü atema Delhi Police-i Tikri aser Ghazipur arrtsülen atsü ajak indokja liasü, aser ibaji aluyimertem mindoktsü nükjidong nung inyak, ta aluyimertemi bilemer. Iba dak sendakba nung Amongnü Tikait-i, longkak aitba tesemtem nungi aluyimertem kangshia mindokra aluyimertemi sorkar office ajak tsük ayokba markets küm daksütsü, ta metetdaksü.



November 07, 2021 nü Patiala nung Punjab Congress in-charge, Harish Choudhary den party lenirtem- Kuljeet Singh Nagra aser Rajkumar Verka nunger senden ka nung adentsü jelia tangokba noksa nung angur. Congress lenirtem senden nung sangküm Punjab Assembly Election atema jembio.



Bosnia yimtiba, Sarajevo kübok Rajlovac tesem nung tayimtsü nungi tangokba noksa ka nung nisung aliba ki tüzümsüng agi metsüngbanger aliba angur. Bosnia nung tzünglu kanga sashia aruba ajanga tüzümsüng adoker ananü jungogo, aser yangji aliba nüburtem tekong bushia aor, yimti tulubalen power shibang, COVID-19 agi shiranger amshiba oxygen facility tongtipang tem shibang aser lenmangtem tzü agi metsüngbanga lir.

Libya foreign minister nem tenokdangba agütsür

Tripoli, Yimpoksüi/Nov. 07 (Agencies): Ketzangsuba maparen nung aibelenba ajanga Libya indang presidential council-i Foreign Minister Najla Mangoush mapa nungi khen atema anentsüogo aser senzüsempongba nungi nokdangar. Council indang odongtar kati ashiba agi, council den amalitep makai foreign policy inyakba atema züngsem asem agi akumba council ajanga Honibarnü Mangoush mapa nungi khen atema anentsü. Odongtari iba dak tali

osang tejangjaba magütsü. Foreign minister nungi telangzüba kecha agüja mali, saka Libya indang transitional Government of National Unity-ibo Deobarnep sangdong ka nung council telemtetba magizük. Sorkar indang Facebook page nung sangdongba nung minister indang inyakyim tenüng asang aser lai akhi ama mapa inyaksüla, ta shia liasü. Parnokisa presidential council ajanga executive tashi atema züngsem shimtsü mesüra shima aliba agientsü,

bushisüngdangtsü tashi mali aser item tashi ya ato kilonser kabu nung lir, ta ashi. Election agitsü hopta trok shi lia aser December 24 nü tir aser parliamentary election ya agitsü asoshi linük balala nungi ketdangsurtem France yimtiba nung adenshia ajungshitsü lia Tripoli iba mepetmesü ya ataloka liasü. November 12 nü Paris mungdang nung linük balala nungi lenirtem den United States Tatong Tir, Kamala Harris aser France Tir, Emmanuel Macron adentsü. (Maneni tapak 9 nung...)

US court-i Biden indang vaccine sentong ka soita lir

Washington, Yimpoksüi/Nov. 07 (Agencies): Mapa inyaker nisung 100 dak tema aliba businesses tem nung COVID-19 mozü agidaksütsü mesüra hopta shia tendangdaksütsü nükjidong nung Tir Joe Biden indang administration ajanga sentong ka yanglua aliba Unites States nung federal appeals court kati soita lir.

nung lir aser parnok kumzüka ayutsü atema yimya tasen nüngdaker ta ajitetba nung ajungben mera agitsü atema Occupational Safety and Health Act ajanga OSHA nem tashi agüja lir. Onoki court nung iba sentong kumzüka ayutsü junga renema lir," ta lai ashi. Private-sector nung inyaker mozü agitsü atema ya OSHA indang emergency authority kübok telemtetba agi, ta ketdangsurtemi ashir. Iba ozüng yagi mapa inyaker million 84.2 aser private sector nung inyaker million 1.9 dak kongshitsü, ta OSHA ajanga ashir.

Iba ozüng nung lendong lir, ta US Court of Appeals for the Fifth Circuit ajanga Honibarnü obendang agütsü.

Iba ozüng ya Brehostibarnü sangdongba den külemi Republican governor aser dangartemi okadak ken o benoktsü nangzüka liasü.

"Iba court ajanga ano maneni mera agitsü atema iba ozüng ya soita atar," ta ashi.

Businesses, advocacy group balala den Texas, Louisiana, Mississippi, South Carolina aser Utah state temi lungjemer petition ka agütsüba nung telangzüba ama Honibarnü court ajanga iba totuyuba ya agüja liasü.

Kaket tapak ana nung totuyuba agütsüba nung Biden administration ajanga Hombar nikongdang 5:00 ako (par mapang) tashinung telangzüba agütsütsü shia lir.

Danga court tem nunga iba ozüng anema ken o benoka lir. Alima ajunga nung asadanga COVID-19 tashidak wara yagi US nung tamajungtiba kongshia lir, kong nisung million 46.5 jungnüa coronavirus agi menep aser nisung 754,000 dak tema asü.

Republican temi aniba state aikati iba ozüng tasenba anema ken o benokba sülen iba obendangba ya agütsü, koba January 4 nungi mapa kuma inyaka aotsü lir.

Solicitor of Labor Seema Nanda-i sangdong ka nung ashiba agi, ozüng agütsütsü atema Labor Department ya tim lir, koba Occupational Safety and Health Administration (OSHA) ajanga mapa kuma inyaksü.

Iraq Ato Kilonser Mustafa'er ki drone agi amak

Baghdad, Yimpoksüi/November 07 (Agencies): Deobar anepdang Iraq Ato Kilonser Mustafa al-Kadhemi'er ki drone amshia amakba sülen PM-i pa iba lendong nung meyiru aser kanga junga lir ta shiogo. Yimden yimsüsüba tsütsü mepetmesü adoker aliba mapang tang iba lendong atalokogo. Baghdad indang Green Zone nung tang mezüngbuba Kadhemi'er makogo, shibai 2020 küm May ita nungi PM mapa bener lir. Taoba ita election agiba sülen Iraq nung tang political party tem sorkar kümtetsü atema longjemtsü asoshi jembishinütepba mapang iba lendong atalokogo.

mokozü adokba nguogo. Kadhemi indang office-i sayaba noksa nung stairway teraksa ka aser kishi loksar aliba nguogo. Lendong atalokba sülen Kadhemi-i Twitter ajanga Iraq ajangzüktsü atema ajak dang süngjemshitsü aser azüzüktepba inyaksü ayongzüka liasü. "Ni aliba ki tasü maiter kari makogo. Ni aser kü kübok inyakerkem ajak anema lir aser iba atema Tsüngrem tenüng asanger," ta pai video ka ajanga osang lemsatepba social media balala nung lemsatepogo. PM office ajanga, pa tepsettsü merangba tamakok nguogo, ta ashi. Kasa mapang nung United States-i, lendong nung PM meyruba angashia kanga anisüngzükogo, ta ashi. Iraq nung US sepai 2,500 shi amenoka lir.

anir aitsü merangba aser constitutional inyakyim anema coup asütsü merangba magizüktsü," ta paisa ashi. Green Zone temeketi security force aika yokogo, kong US embassy dena amenoka lir, koba rocket agi mapangshia maka arudar. October 31 nü rockets asem Mansour nung pokloksü, ajisüaka iba lendong nung nisung ka danga meyiru. United Nations Assistance Mission for Iraq (UNAMI)-ia, Kadhemi-i ayongzükba ama azüzüktepba inyaksangshitsü ayongzükogo. "Telok ajak dang tensa süngjemshidaksütsü atema

khuret abentsü aser Iraq ajangzüktsü atema yimden yimsüsüba tsütsü mangatettep aliba sensaksem ajanga bentettsü ajungshir," ta UNAMI-i ashi. Maneni cleric Sadr-i ashiba agi, PM ki amakba ya Iraq aser Iraq nungertem anema inyakba maparen ka lir. October 10 nü election result sangdongba sülen yimden yimsüsüba tsütsü mepetmesü nung aliba mapang iba lendong atalokogo. 2003 küm US-i anir dictator Saddam Hussein atsüngtokba sülen tang agi election pongubenbuba agiogo. Hokolbarnü Hashed pusemertem aika Green Zone

anasa longkak aita aliba mapang police den mangatettep adoka liasü. Iba tatalokba sülen longkak aiter ka mozükidang asü, ta security source kati ashi aser kasa mapang nung Hashed source kati ashiba agi iba lendong nung longkak aiter ana tepsetogo. Maneni Honibarnüa longkak aiterkem aika Green Zone nung adenshi aser parnok rongnung nisung kari Ato Kilonser indang noksa rongtokja liasü, shiba dang parnoki ozüng raksar ka ta ajar. Election result tatembangbuba ya iba hopta sangdongtsü imlar.

Election nung pro-Iran Hashed al-Shaabi paramilitary network indang political arm, Conquest (Fatah) Alliance puri menden aika nung tamakok angu aser iba ajanga par teloki inyakyim nung oshi mashi densema lir ta shiogo. Election nung Moqtada Sadr-i aniba teloki menden 70 dak tema akok. Moqtada ya Shiite Muslim preacher ka shibai nationalist ka aser Iran aitsür ka ama nüboyima liasü. Deobarnü PM'er ki amakba tang tashi nung telok kati danga nangzüka mali. Iba lendong nung bodyguard ana yirua liasü, ta security source kati ashi. Drone agi amakba sülen prangbong akhaba ola angashiba den Green Zone nung



Tzü-mopung wazüka ayutsü asoshi nokdakertemi London nung longkak aita jajaba noksa ka yangi angur. Glasgow nung COP26, UN Climate Summit tatem kati aruba mapang alima tesem ajungalen nüburtemi iba longkak aitba nung shilem agir.

FAC indang Eco Club-i 'The Santa's Workshop' ayongzük



Mokokchung, Yimpoksüi/November 07, 2021: Young Women Christian Association (YWCA) den Eco Club, FAC longjemer ayongba - 'The Santa's Workshop' nung shilem agirtem aser shisalen sayurtem külemi tangokba noksa ka yangi angur.

Mokokchung, Yimpoksüi/November 07, 2021 (TYO): Fazl Ali College indang Eco Club den Young Women Christian Association (YWCA), Mokokchung longjemer "The Santa's Workshop" ayongzük lia sü. Iba workshop sentong nung Fazl Ali College nungi kaketshirtemi shilem agiogo aser parnok dang, mamshiba oset aser asen meküta aliba

nungi anguba osettem (natural items) amshia jenjang dalang indang Khristmas benjung sobutsü aser iba benjung dak sendakba osettem yanglutsü asoshi training agütsü. Khristmas mongpu tonga arur asünung, kaketshirtem aser iba workshop nung shilem agir tangartem dang 'sustainable' aser 'eco friendly' Christmas benjungmung amungtsü asoshi tekümdangtsü

osang sangoktsütsü nükjidong nung iba workshop ayongzük lia sü. "The Santa's Workshop" ya Fazl Ali College, Mokokchung indang Eco Club-i küm shia ayonga agiba sentong ka lir aser taküm iba workshop sentong ya Honibarnü (06.11.2021) "Yimchalu" nung agiogo, kong züngsem 30 agi shilem agia lia sü, ta kasa sangdong nung shia lir.

Diphupar A nung Tokhu Emong benjung amung



Dimapur, Yimpoksüi/November 07, 2021: Church Colony Diphupar A nung alir Lotha kin ajanga ayongba Tokhu Emong benjungmung sentong nung tanurtemi pei kin (Lotha) sobusülemtsü semer sobaliba tsüngsang ka sayuba yangi noksa nung angur.

Dimapur, Yimpoksüi/November 07, 2021 (TYO): Lotha kin den jangyumedema medema, Deobarnü (07.11.2021) New Church compound Diphupar nung Diphupar 'A' Church Colony nung alir Lotha kintemi Tokhu Emong benjungmung munga lia sü, ta sangdong ajanga metetdaksü.

Wonchibeni Ngullie, Melody Khuvung aser Eyilobeni Ngullie tawabangba kübok tanurtemi pei kin sobusülemtsü sobur sobaliba tsüngsang sayua lia sü. Kasa sentong nung, CNY Director, Ajano Patton aser Janpeni Ovung nati anir tetsürtemi sobaliba ken ka tena lia sü. Lotha Baptist Church Diphupar, Pastor, Rev Limhathung Lotha-i iba benjungmung temoatsü

meshizüka sarasademtsü aser sentong tenzüka Mosa Patton-i sarasadema lia sü. Iba sentong nung, Elliey Humstoe menden lia sü. Lotha Community Diphupar, Chairman, Zubenthung Patton-i tepela anküp o jembi. Women Leader, LBCD, Yanpvulo Ovung-i tatem sarasadema lia sü aser sentong temer sülen telok chiyongba sentong agia lia sü, ta kasa sangdong nung shia lir.

Libya foreign minister nem...

Tan hopta BBC den sensaksemba mapang 1988 Lockerbie bombing indang lai jembiba mechi mapa nungi anentsü südi, ta Libya yimtenren tsütsü takotet nisung, Emadeddin Badi-i ashi. Badi-i ashiba agi, sensaksemba mapang tayimtsü nung bomb pokdaksüba maparen nung bushia alisang Abu Agila Mohammed Masud

ya anir arutsü akok aser iba ken o sorkari aginüba ama ataloker, ta Mangoush-i shia lia sü. Taoba mapang Libya indang intelligence service nung züngsem, Masud-i Pan Am Flight 103 poksatsüba indang bomb ya bendena tasa yanglua lia sü, ta US-i tai tongloksü. Iba tayimtsü ya 1988 küm Scotland kübok Lockerbie jila ajanga yima aoba mapang poksaja

nisung 270 takum samaja lia sü. NATO-i yariba sorkar anema nokdakertemi mapang talangka nungi lenir süa arusang Muammar Gaddafi yimli 2011 küm laodaksüba sülen Libya nung rongrong-shirong agi sünger arur. Pa ya iba küm telungpur temi pua tepseta lia sü. Totzü talubusa aliba linük nung küm aika sorkar telok ana tsüngta sadanger yimsü süa aru,

LONGSA SENSO MORIA MISSION

Hon Jubilee Mung Sentong

Omen: "Sentsüwangshi Nüchi" 2 Kor. 3:17



Anogo : November 13-14, 2021

Onük Jembirtem

Wt. Mapula Missionary, IEF

Rev. Dr. Mar Pongen,
Executive Secretary, ABAM, Impur
Rev. Dr. Alemrenba Pastor, DABA

METETDAKTSÜR: Longsa Senso nübur aser anükapang ajak iba Hon Jubilee nung pelashishia jaoker.

November Blooms sentong tenzüko



Kohima, Yimpoksüi/November 07, 2021 (TYO): Honibarnü (06.11.2021) RCEMPA, Jotsoma nung November Blooms sentong tenzüka lia sü. Imagi.NATION ajanga iba sentong achaayanger, kong shilem agirtemi tejangraba tulu nung music aser arts tem sayuogo.

November Blooms sentong ya tan ita Honibar shia agitsü renema lir aser taruba sentongtem November 13, 20 aser 27, November 2021 nü RCEMPA, Jotsoma nung nikongdang 3:00 ako nungi tenzüka agitsü.

Honibarnü, iba sentong nung Pop up stall 20 lapok, kong collectors, kaket sapurtem, chiyongtsü sapurtem, music jangrartem aruagi denogo aser parnoki telangzüba tajung agüja lia sü.

Ano külen, tsüngsanger aser

kontener temi shilem agiba den Advisor TaFMA Theja Meru-i iba sentong nung shilem agia lia sü; aser sempet tajung alirtem nem 'gift hamper' agütsü, koba NN Ventures ajanga item sempet agüja lia sü.

Shishilembatsü (shopaholics) jangrartem atema, fashion balala indang sübosülemtsü aser osettsüset balala sayuogo. Music sapurtem atema aonung 6:00 ako meta band balalai ken tenogo. Kasa mapang, chiyongtsü sapurtem atema chiyongtsü tapu balala renemer sayuogo. Ajüsüaka, iba sentong nung dance crew temi nisung timbaka atsüa aru.

Kidang yanglutetba osettem (home grown brands), tangar teyari magiba artists aser lokti tsüngda shisadokten inyakyim tsütsü nungitsü nükjidong nung, November Blooms sentong ayongzüker.

"Taküm küm-a asenoki timtem ajangshia aruogo, ajiasünung art, fashion, music, dance nung sempet tajung alirtem nem sabang ka agüja maparen tenzüksütsü onoki bilem. Tanü November Blooms tenzüker, koba Hornbill 2021 matong tashi November ita Honibar shia iba sentong ayonga agitsü. Taruba Honibarnü (13.11.2021) Latvia nungi ainertem arutsü aser choral sentong agitsü terenemba lir," ta

Theja Meru-i ashi.

(Tapak 8 nungi...)

ka linük yimtiba Tripoli nung amenok aser ka linük anüdoklen amenoka lia sü. Telok anaprong ya linük balala aser mitkar balalai yaria lia sü.

Tang tenteta aliba interim government ya UN-i anir küm aika jembishinüa aruba sülen February ita shimteta lia sü. Yangji presidential council aser anogoshi inyaksangshi anitsü Cabinet minister tem dena lir.

Seiyhama nung volleyball asayamung Michazou Mima-i kokogo



Asayamung akokba Michazou team aser ketdangsürtem tangokba noksa nung angur.

Kohima, Yimpoksüi/November 7 (TYO): Seiyhama Baptist Church-i ayongzükba 1buba Open Volleyball asayamung Michazou Mima-i kokogo. Asayamung final ya November 6 nü Kohima district kübok Seiyhama yimtsüing nung asayaa liasü.

Asayamung akokba sülen Michazou team nem senpet sen 20,000 agütsü aser runner-up team Nexus, Kohima nem senpet sen 15,000 agüja liasü.

Kasa mapang nung Semi finalists Koinonia Prayer Centre Tsiese Basa aser Chienino Brothers, Kiruphema team nema senpet sen 5000 (team shia) agüja liasü.

Kasa mapang nung Michazou nungi asayar Menuokho Nguukha nem best spiker naroküm aser Chienino Brothers nungi asayar Menuoselie Hojha nem best setter naroküm agüja liasü.

Asayamung shibangba sentong nung Seiyhama

yimtsüing Council chairman Lhoulalie Zumu alakteta joker liasü aser pai sempetem agütsü.

Asayamung lapokba sentong nung Nagaland Football Coaches Association (NFCA) tir aser Northern Angami Youth Organization (NAYO) tir Roko Angami alakteta jaoker liasü.

Phek district nungi team ka densema iba asayamung nung Kohima district nungi team 22-i shilem agiogo.

Dronacharya Award angusang Tarak Sinha süogo

New Delhi, Yimpoksüi/November 7 (Agencies): Nüngtugu cricket coach Tarak Sinha, shibai India cricket asayatem den küm aika inyakogo, pa Honibarnü New Delhi nung cancer agi süogo. Tarak arishi küm 71 liasü.

Tarak Singh ya mapang tatsüka tepokpok cancer agi timtema liasü aser tawa poknüng shilem kar nung mapa juga meinyaki kumadok. Honibar anepdang New Delhi hospital nung Sinha asü. Desh Prem Azad, Gurcharan Singh, Ramakant Achrekar aser Sunita Sharma nunger sülen Dronacharya Award agizüker India cricket coach rongnung Tarak Sinha pungobuba liasü.

Taoba mapang coach, Tarak ya Delhi nungi lir aser 2018 küm pa nem Dronacharya Award agüja liasü.

Tarak Sinha, shiba New Delhi kübok Sonnet Cricket Club nung inyaka liasü, pa mapang talangka cricket asayatem den külemi inyaka aruogo. Rishabh Pant, shiba International cricket asaya nung batter tajung ka ama jenjang



ajangzüketa lir, pai Sinha ya tebu ka ama züngshir aser Coach Sinha-i Dronacharya Award anguba mapang, Rishabh kanga pelaa liasü.

"Ita ana tashi tepokpok cancer agi shiranga aruba sülen, Honibar anepdang 3:00 ako meta Sonnet Club ngutetsang Tarak Sinha iba akümüli nungi pilaogo. Pa asüba osang angashia temulung raksar," ta sangdong ka nung Sonnet Cricket Club-i ashi.

"Sonnet Cricket Club atema pai bendanga agüja inyak aser ibaji ajanga India aser Delhi cricket nung asayar tajung aika adokogo.

"Pa (Tarak) temang nung timtem alidang aser pa iba tashidak nungi taneptsü angutsü

asoshi kwinakati aria bilemja sarasadem agi nungitta yariogo, nenok kija shia dang pelar. Iba den külemi Jaipur aser Delhi nung pa taküm kümzüksü asoshi anibelem arema tajungtiba agi yariba atema onoki doctor tem dang pelaba shisemer," ta Club-i lemsatop.

"Tarak-i pa student tem tim nung anitetsü nükla yur inyak aser coach ka ama mapang shia pai shisatsü agi nungitta yariogo. Pa temang nung timtem tulu liaka, pai asayatem tajungtiba nung anitetsü bilema liasü. Arishi küm 70 nunga, pai cricket asayar tasen den külemi inyaksü aser tesayuba agütsütsü kanga jangra liasü. Iba tashidak nungi taneptsü yakta angutsü teimla nung, tasünü tashi pa pelaa dang liasü," ta Club-i ashi.

Tarak Sinha indang student rongnung Rishabh Pant, Ashish Nehra, Sanjeev Sharma, Aakash Chopra, Shikhar Dhawan, Anjum Chopra, Surender Khanna, Randhir Singh, Raman Lamba, Manoj Prabhakar, Ajay Sharma, K.P. Bhaskar aser Atul Wassan nunger dena lir.

Ravi Shastri-i Ahmedabad team coach mapa agizüksü akok

New Delhi, Yimpoksüi/November 7 (Agencies): Indian Premier League (IPL) nung team tasenba Ahmedabad franchise-i Indian team coach Ravi Shastri aser Bharat Arun na IPL 2022 atema coach asütsü shimtsü akok.

Shastri, Arun, aser Sridhar nunger T20 World Cup tembangba sülen India cricket team coach mapa toktsütsü aser BCCI-i team coach asütsü atema Rahul Dravid shimatokogo.

Cricbuzz sangdong ka ajanga ashiba agi, Shastri nem Ahmedabad franchise-i coach

mapa abentsü atema maongka agütsüogo aser paia IPL team ka coach mapa inyaksü jangraba lemsatopogo.

Ajisüaka Indian coach yagi T20 World Cup tembangba sülenang telemtetba ka agitsü. Pai Asayamung mapang kecha meinprong maginer. Taoba India team nung asayar yagi iba mapa agizükra Bharat Arun aser R Sridhar nata pa indang staff nung adentsü.

Osang ajangsa, CVC Capitals-i iba tenangzüktepa ya takaratiba nung aginer, kechiyong parnoki tetenzük nungi team culture ka yangluner.

Ahmedabad aser Lucknow, ta team ana bendenlokba sülen 2022 küm nungi IPL nung team 10 asayatsü. Sanjiv Goenka indang RPSG group-i crore 7090 agi Lucknow franchise alizük aser CVC Capitals-i Ahmedabad team ya sen crore 5625 agi alizüka liasü.

IPL season tasenba metenzük tsünga mega-auction ka agitsü renema lir. Tang aliba team tem nem asayar pezü mechiki ayutsü maongka agütsüogo aser team tasen tem nema auction pool-i maitba asayar asemsem shimtsü atema maongka agütsüogo.

Djokovic aser Medvedev na Paris Masters final asayatsü

Yimpoksüi/November 7, 2021 (Agencies): Honibarnü Paris Masters semi-final nung World number two Daniil Medvedev-i 6-2 6-2 agi Alexander Zverev koka Novak Djokovic den final asayatsü jangjaogo.

Iba asaya nung Russia nunger asayar yagi aces trok ao aser pa indang first-serve points shilem 80 shi koka liasü. Kasa mapang nung Zverev-i double faults pezü mena aser tanabuba set nung pa indang serve break südaktsüba sülen mit adoka pa indang racket court nung züklokja liasü.

"6-2 6-2 agi koka alidangbo temelenshitsu kecha matoker," ta pai ashi.

Pa tang agi 10benbuba Djokovic den asayatsü shibai semifinal tanga ka nung Polish nunger asayar Hubert Hurkacz 3-6 6-0 7-6(5) agi koka liasü.

Djokovic-i taküm Grand Slam pezüprongla akoktsü maongka liasü, ajisüaka Iba asaya kanga Septemeber ita U.S. Open final nung pa Medvedev-i koka liasü.

"Pa tang kanga junga asayadar. Pai serve aika mopeter aser kanga junga odar. Pa asayaba yimya shidak kati arur ama bilemer," ta Djokovic-i osangbenertem dang ashi.

Serbia nunger asayar ya taküm temaba jenjang nung tembangtsü. Pai taküm agi tentbenbuba temaba jenjang nung tembanga otsü tasen yangluogo.

"Küna tatembangsa asayaba mapang pai ni amokbanger asayaa liasü. Tang iba final asaya nungbo ni meyiper pa amokbanger asayatsü imlar," ta Djokovic-i ashi.

Kasa mapang nung arishi küm 25 tain Medvedev-i, Grand Slam 20 ben tashi koker aliba asayarden asayatsü atema maongka anguba atema kanga pelar, ta ashi. "Ni tanur asüba mapang pa asayaba TV nung repranga liasü. Ni pa den mezüngbuba Davis Cup nung asayaba tang tashi bilemteter. Iba asaya kanga jangrademtsüka liasü," ta Medvedev-i ashi.

T20 World Cup: South Africa asayamung nungi tuguogo

Yimpoksüi/November 7, 2021 (Agencies): South Africa team atema group stage nung tatembangbuba asaya nung England team kokaka parnok asayamung nung tsükogo.

Australia-i West Indies team kanga junga akokba sülen SA asoshi mapa kanga tasak aküm. Parnoki England den asaya run 10 agi akok aser parnok rongnungi Kagiso Rabada-i over tatembangbuba nung hat-trick agia liasü.

England kokaka parnok semi metongtet, kechiyong parnoki net run rate agi Australia team (1.216) memenep. S. Africa indang net run rate 0.739 dang liasü.

Group asaya nung SA-i Bangladesh team nem run 84 dang yangludaktsü ajisüaka parnoki over 13.3 nungang iba run menepba ajanga parnok kanga akoksa. Kasa mapang nung Australia-i West Indies kanga junga akokba sülen SA puri England run 61 agi akoktsü nüngdaka aküm.

Mezüng bat asütsü maongka anguba sülen Rassie van der Dussen-i ball 60 nung run 94 yanglu aser Aiden Markram-ia (52 not out, 25b, 4x6, 1x4) kanga junga asayaa South Africa-i asayar ana out ser run

189 yanglua liasü.

Ajisüaka parnoki England team run 131 nung ajak out sütsütsü nüngdaka liasü. England team nung asayar Jason Roy single ka asemba mapang yirur tuguatokba sülen parnok nem timla agütsü, ajisüaka iba ajanga kecha temelenshi matok.

Asaya nung Jos Buttler (26; 15b, 1x6, 3x4) aser Jonny Bairstow (1) na yakta out süadok saka Moeen Ali (37; 27b, 2x6, 3x4) aser Dawid Malan (33; 26b, 1x6, 3x4) nati England team nem timla agütsü. Iba sülen Liam Livingstone (28; 17b, 3x6, 1x4)-i Rabada-i ball aonba mapang six asem züka over 16buba nung run 131 ajung.

Rabada-i asaya tatemlen ball kanga junga aon ajisüaka asaya tetenzüklen pa kanga nüngdaka aliba mapang pa indang over asem nung wicket ka danga magi-i run 45 yangludaktsü.

South Africa team batting amenba mapang over 10 tashi nung parnoki run 73 dang yanglu liasü ajisüaka tatembangbuba Over 10 nung parnoki kanga junga asaya.

SA team nungi asayar van der Dussen aser Markram nati tatembangbuba over pongu nung run 71 yanglua liasü.

BILEMDANGANG

"Peisasa kanga nema bilemra temulung mesüi dang alitsü."